

巢氏諸病源候總論卷十四

欬嗽病諸候

凡十五論

欬嗽候

欬嗽者肺感於寒微者則成欬嗽也肺主氣合於皮毛邪之初傷先客皮毛故肺先受之五藏與六府爲表裏皆稟氣於肺以四時更王五藏六府皆有欬嗽各以其時感於寒而受病故以欬嗽形證不同五藏之咳者乘秋則肺先受之肺咳之狀咳而喘息有音聲甚則唾血乘夏則心受之心欬之狀咳則心痛喉中喝喝如梗甚則咽腫喉痺乘春則肝受之肝咳之狀咳則兩脇下痛甚則不可以轉轉則兩胠下滿乘季夏則脾受之脾咳

巢氏諸病源候總論卷十四

欬嗽病諸候
凡十五論

欬嗽候

欬嗽者肺感於寒微者則成欬嗽也肺主氣合於皮毛邪之初傷先客皮毛故肺先受之五藏與六府爲表裏皆稟氣於肺以四時更王五藏六府皆有欬嗽各以其時感於寒而受病故以欬嗽形證不同五藏之咳者乘秋則肺先受之肺咳之狀咳而喘息有音聲甚則唾血乘夏則心受之心欬之狀咳則心痛喉中喝喝如梗甚則咽腫喉痺乘春則肝受之肝咳之狀咳則兩脇下痛甚則不可以轉轉則兩胠下滿乘季夏則脾受之脾咳

之狀咳則右脇下痛陰引於髀背甚則不可動動則
咳劇乘冬則腎受之腎咳之狀咳則腰背相引而痛甚
則咳逆此五藏之咳也五藏咳久不已傳與六府脾咳
不已則胃受之胃咳之狀咳而嘔嘔甚則長蟲出肝咳
不已則膽受之膽欬之狀咳嘔膽汁肺咳不已大腸受
之大腸欬之狀咳而遺屎心咳不已則小腸受之小腸
欬之狀咳而失氣氣與咳俱失腎咳不已膀胱受之膀
胱欬之狀咳而遺尿久咳不已三焦受之三焦咳之狀
咳而腹滿不欲食飲此皆聚於胃關於肺使人多涕唾
而面浮腫逆氣也又有十種欬一曰風欬語因咳言不
得竟是也二曰寒咳飲冷食寒入注胃從肺脈上氣內

外合因之而咳是也三日支咳心下鞶滿咳則引痛其
脉反遲是也四日肝咳咳而引脇下痛是也五日心咳
咳而唾血引手少陰是也六日脾咳咳而涎出續續不
止引少腹是也七日肺咳咳而引頸項而唾涎沫是也
八日腎咳咳則耳聾無所聞引腰臍中是也九日膽咳
咳而引頭痛口苦是也十日厥陰咳咳而引舌本是也
診其右手寸口名氣口以前脉手陽明經也其脉浮則
爲陽陽實者病腹滿善氣喘咳微大爲肺痺咳引小腹
也咳嗽脉浮喘者生小沈伏匿者死

又云脉浮直者生沈鞶者死咳且嘔腹脹且泄其脉弦

急欲絕者死咳脫形發熱脉小鞶急者死咳且羸瘦絡

脉弱大者死咳而尿血羸瘦脉大者死

久咳嗽候

肺感於寒微者卽成咳嗽久咳嗽是連滯歲月經久不
瘥者死也凡五藏俱有咳嗽不已則各傳其府諸久嗽
不已三焦受之其狀欬而腹滿不欲飲食寒氣聚於胃
而關於肺使人多涕唾而變面浮腫氣逆故也

咳嗽短氣候

肺主氣候皮毛氣虛爲微寒客皮毛入傷於肺則不足
成咳嗽夫氣得溫則宣和得寒則否澀虛則氣不足而
爲寒所迫併聚上肺間不得宣發故令咳而短氣也

咳嗽上氣候

夫咳嗽上氣者肺氣有餘也肺感於寒微者則成咳嗽
肺主氣氣有餘則喘咳上氣此爲邪搏於氣氣壅不得宣發是爲有餘故咳嗽而上氣也其狀喘咳上氣多涕唾而面目脣腫氣逆也

久咳嗽上氣候

久咳嗽上氣者是肺氣虛極風邪停滯故其病積月累年久不瘥則胸背痛面腫甚則唾膿血

咳嗽膿血候

咳嗽膿血者損肺損心故也肺主氣心主血肺感於寒微者則成咳嗽傷於陽脉則有血血與氣相隨而行咳嗽極甚傷血動氣俱乘於肺肺與津液相搏蘊結成

濕故咳嗽而膿血也

久咳嗽膿血候

肺感於寒微者則成咳嗽咳嗽極甚傷於經絡血液蘊結故有膿血氣血俱傷故連滯積久其血黯瘀與膿相雜而出

呻噦候

呻噦者猶是咳嗽也其胸鬲痰飲多者噦則氣動於痰上搏喉咽之間痰氣相擊隨噦動息呼呻有聲謂之呻噦其與咳嗽大體雖同至於投藥則應加消痰破飲之物以此爲異耳

暴氣咳嗽候

肺主於氣候皮毛人有運動勞役其氣外泄腠理則開因乘風取涼冷氣卒傷於肺卽發成嗽故爲暴氣嗽其狀嗽甚而少涎沫

咳逆候

咳逆者是咳嗽而氣逆上也氣爲陽流行府藏宣發腠理而氣肺之所主也咳病由肺虛感微寒所成寒搏於氣氣不得宣胃逆聚還肺肺則脹滿氣遂不下故爲咳逆其狀咳而胸滿而氣逆髀背痛汗出尻陰股膝踹骭足皆痛其湯熨針石別有正方補養宣導今附於

戶庚切

養生方導引法云先以鼻內氣乃閉口咳還復以鼻內

氣咳則愈向晨去枕正偃臥伸臂脰瞑目閉口無息極
脹腹兩足再頃間吸腹仰兩足倍拳欲自微息定復爲
之春三夏五秋七冬九蕩滌五藏津潤六府又云還向
反望倒望不息七通治咳逆胸中病寒熱也

久咳逆候

肺感於寒微者則成咳嗽久咳嗽者是肺極虛故也肺
既極虛氣還乘之故連年積月久不瘥夫氣久逆不下
則變身面皆腫滿表裏虛氣往來乘之故也

咳逆上氣候

肺虛感微寒而成咳咳而氣還聚於肺肺則脹是爲咳
逆也邪氣與正氣相搏正氣不得宣通但逆上喉咽之

間邪伏則氣靜邪動則氣奔上煩悶欲絕故謂之咳逆
上氣也

久咳逆上氣候

肺感於寒微者則成咳嗽久咳逆氣虛則邪乘於氣逆
奔上也肺氣虛極邪則停心時動時作故發則氣奔逆
乘心煩悶欲絕少時乃定定後復發連滯經久也

咳逆上氣嘔吐候

五藏皆稟氣於肺肺感微寒則咳嗽也寒搏於氣氣聚
還肺而邪有動息邪動則氣奔逆上氣上則五藏傷動
動於胃氣者則胃氣逆而嘔吐也此是肺咳連滯氣動
於胃而嘔吐者也又有季夏脾王之時而脾氣虛不能

王有寒氣傷之而咳嗽謂之脾咳其狀咳則右脇下痛
瘡瘍引髀背甚則不可動動咳發脾與胃合脾咳不已
則胃受之其狀咳嗽而嘔嘔甚則長蟲出是也凡諸咳
嗽甚則嘔吐各隨證候知其府藏也

咳逆短氣候

肺虛爲微寒所傷則咳嗽嗽則氣還於肺間則肺脹肺
脹則氣逆而肺本虛氣爲不足復爲邪所乘壅否不能
宣暢故咳逆短乏氣也

淋病諸候

凡八論

諸淋候

諸淋者由腎虛而膀胱熱故也膀胱與腎爲表裏俱主

水水入小腸下於胞行於陰爲溲便也腎氣通於陰陰津液下流之道也若飲食不節喜怒不時虛實不調則府藏不和致腎虛而膀胱熱也膀胱津液之府熱則津液內溢而流於睪水道不通水不上不下停積於胞腎虛則小便數膀胱熱則水下澀數而且澀則淋瀝不宣故謂之爲淋其狀小便出少起數小腹弦急痛引於齊又有石淋勞淋血淋膏淋諸淋形證各隨名具說於後章而以一方治之者故謂之諸淋也其湯熨針石別有正方補養宣導今附於後

養生方導引法云偃臥令兩足布膝頭斜踵置尻口內氣振腹鼻出氣去淋數小便

又云蹲踞高一尺許以兩手從外屈膝內入至足趺上
急手握足五指極力一通令內曲入利腰髓治淋

石淋候

石淋者淋而出石也腎主水水結則化爲石故腎客沙
石腎虛爲熱所乘熱則成淋其病之狀小便則莖裏痛
尿不能卒出痛引少腹膀胱裏急沙石從小便道出甚
者塞痛令悶絕其湯熨針石別有正方補養宣導今附
於後

養生方導引法云偃臥令兩足布膝頭斜踵置尻口內
氣振腹鼻出氣去石淋莖中痛

氣淋候

氣淋者腎虛膀胱熱氣脹所爲也膀胱合與腎爲表裏
膀胱熱熱氣流入於胞熱則生實令胞內氣脹則小腹
滿腎虛不能制其小便故成淋其狀膀胱小便皆滿尿
澀常有餘瀝是也亦曰氣癃診其少陰脉數者男子則
氣淋其湯熨針石別有正方補養宣導今附於後
養生方導引法云以兩足踵布膝除癃

又云偃臥令兩足布膝頭取踵置尻下以口內氣腹脹
自極以鼻出氣七息除氣癃數小便莖中痛陰以下溼
小腹痛膝不隨也

膏淋候

膏淋者淋而有肥狀似膏故謂之膏淋亦曰肉淋此腎

虛不能制於肥液故與小便俱出也

勞淋候

勞淋者謂勞傷腎氣而生熱成淋也腎氣通於陰其狀尿留莖內數起不出引小腹痛小便不利勞倦卽發也

熱淋候

熱淋者三焦有熱氣搏於腎流入於胞而成淋也其狀小便赤澀亦有宿病淋今得熱而發者其熱甚則變尿血亦有小便後如似小豆羹汁狀者畜作有時也

血淋候

血淋者是熱淋之甚者則尿血謂之血淋心主血血之行身通遍經絡循環府藏勞甚者則散失其常經溢滲

入胞而成血淋也

寒淋候

寒淋者其病狀先寒戰然後尿是也由腎氣虛弱下焦受於冷氣入胞與正氣交爭寒氣勝則戰寒而成淋正氣勝戰寒解故得小便也

小便病諸候

凡八論

小便利多候

小便利多者由膀胱虛寒胞滑故也腎爲藏膀胱腎之府也其爲表裏俱主水腎氣下通於陰府既虛寒不能溫其藏故小便白而多其至夜尿偏甚者則內陰氣生是也

小便數候

小便數者膀胱與腎俱虛而有客熱乘之故也腎與膀胱爲表裏俱主水腎氣下通於陰此二經既虛致受於客熱虛則不能制水故令數小便熱則水行澀澀則小便不快故令數起也診其跗陽脉數胃中熱卽消穀引食大便必聊小便卽數其湯熨針石別有正方補養宣導今附於後

養生方導引法云以兩踵布膝除數尿
又云偃臥令兩足布膝頭斜踵置尻口內氣振腹鼻出
氣去小便數

小便不禁候